

## Thim leh eng

Kan ram hmabak sawikhawm nikhuain, 'nakin lawkah chuan mi retheiin hriam an lek hun a thleng ang a, thisen kan inchhuah tawn ang' tiin lungngai takin kan sawi fo thin a. Hei hi thil thleng thei ngei pawh niin a lang a. Khawvel ram hrang hranga tualchhung buaina te hi corruption hrinchhuah a ni a, tuna India rama buaina thar rapthlak, Naxalite emaw Maoist movement kan tih te hi milian ho corrupt in an hrek cher thinrim mirethei ho che chhuak an ni tih i hre reng ang u.

Right to Information Act kan nei tawh a, he Dan hmang hian kan duh apiang kan hre thei a ni ber tawh a. He Dan hi hmang tangkaiin kan chanvo leh chanai tuten emaw an lo eiruk lohnna hma kan la thei tih hriain ke kan pen thei tawh a. Huaisen leh taima taka hma kan lak chuan he ram hi kan tungding leh thei ang a. Ram nuam leh hausa kan ni thei ang.

Khawvel ram hrang hrang thlir i la, corruption avanga hnam hrang hrang tawrhna te en a, harhchhuah a tul ta.

Khawvel-ah hian hnam ropui tak tak an lo tluchhe tawh thin a. Chhengkaw ropui tak tak an lo ral tawh thin bawk. Heng hnam ropui tluchhia zawng zawng hi corruption in a eichhiat an ni zel a. Chhengkaw ropui thamral ta te hi rinawm loh rah seng an ni zel a ni.

Thimna leh hmasawanna in min hmuak a, khawilam nge kan pan dawn tih duh thlangtu tur chu keimahni kan ni a. Kan duhthlanna tihlawhtling tura hma la thei tu chu keimahni chauh kan ni.

## Enge kan tih tak ang?

Corruption umbo nan hian kan zavaiin mawhphurhna kan nei a. Sorkar hian langtlang leh rintlaka hna thawkin RTI hi anih dan tur takin kalpui se la. Sorkar hnathawk te hian an rilru puthmang thlakin Pathian tihna leh ram hmangaihna nen dik takin hna thawk se la. Kohhran leh pawl kan neih sa te hi sorkar khalh ngil zawnga hma la turin piangthar hlawn i la. Khawtlang roreltu te hian dik taka ro relin sorkar hmalakna tihlawhtling turin inpe zual se la. Mimal tinin rilru thar puin sorkar hmalakna leh vantlang thil te hi taneih nachang hre thar i la.

Corruption hi Pathian huat zawng sual anih avangin a do hna hi Pathian rawngbawlna a ni a.

Corruption hi ram leh hnam tiboral theitu sual, ram hmelma anih avangin a do hna hi ram leh hnam rawngbawlna a ni a.


Corruption hi mihringin kan tuar thin avangin a do hna hi mahni mihring pui tana rawngbawlna a ni a.

Corruption do hi mi huaisen hna anih avangin i do ngam chuan mi huaisen i ni tihna niin i do ngam loh erawh chuan midawihzep i ni tihna a ni a.

Kan ram tichhe tu, Pathian huat zawng sual – corruption do hi a hlauhawm lo tih mitinin kan hriat a, kan harhchhuah a hun tawh a. 'Misual chu um lohin an tlanche thin' tia sawi angin heng misual te hi an dawihzep a, Dan hmanga ke i pen ngam phawt chuan eng anga mi te pawh niin inhre mah la mi corrupt te chuan an hlau hle ang che.

\*\*\*\*\*

# CORRUPTION I DO ANG U



## PRISM

(Regd. No. MSR – 96)

V – 27/C, Venghlui, Aizawl – 796 001

PO Box – 111, Aizawl, Mizoram

Ph.: 0389-2300375

Copies – 10,000

***Corruption hi tawngkam lar ber te zing ami a nih laiin a tlukupui kan tawngah a awm lo a, hei hian Mizote rinawm zia a tarlang a ni.***

**Enge a nih?**

Khawvel pum pawm tlan theih corruption hrilhfhahna a awm loh avangin UNO chuan hrilhfhah tum ai chuan a huam thil hrang hrang ziahchhuah mai tha a ti a. Corruption hian – diklo taka induhsakna te, thamna pek leh dawn te, chanvo leh hna pek dawna thil phut chhuah te, mahni emaw duhsak zawngte emaw hlawk nana midang chanai pawh pen te, inthlan laia pawisa hmanga vote lei te, vantlang thil chhehrelh te, mipui pawisa chhehrelh te, hnathawh tur ruahman aia chhiaa hnathawh te huam vekin- 'sorkarin mipui tana tha tura ruahmanna a siam tihlawhchhamtu Dan kal pela thiltih zawng zawng a huam vek' a ni.

**Kan ramah hian**

Corruption hi keimahnia ro kan inrel a, lal leh upate roelna leh zawlbuk inthununna hmanga kan inawp lai khan a awm ve anih pawhin a tlem hle ni tur a ni a, sawi tur a vang hle a. District Council kan neih lai khan corruption case pahnih khat chu a awm nia sawi a ni a. UT kan nih a, a hman dan enzuina leh khuahkhirhna mumal awm lova pawisa a lo luan luh hnu khan a hluar ta a. State kan nih hnuah pawh ziaawm lam a pan mawh hle.

Corruption thatlohzia hria pung chhoin kum 1982-ah Mizoram Presbyterian Church Synod in 'Corruption Do Kum' a puang a, mipui-ah harhna nasa tak a thleng a. Inenlet nachang hrechhuakin

corruption duh lohna leh huatna chu a rawn alh chho ta a. Mahse, 'paper pakhat hawn ruk leh cheng maktaduai tel eiruk hi Pathian hmuhah sual thuhmun a ni' ti leh 'tumah kan fihlim lo' ti tea thawktu dangin tlang a rawn autir chuan corruption duhlohna thanglian tur chu a tichuai leh ta.

Mahse, he sual lakah hian kan Pathianin min chhanchhuah a duh miao avangin hmun hrang hrangah tlangau a dah reng a. Kum tam a vei hmian Rev Zairema (fam) leh Pu Bualhranga te an rawn penchhuak a. Mi huaisen nih chakna thangthar thilungah a rawn tuh ta a ni.

Kum 2005-a Central sorkarin 'Right to Information Act' siam chhuaka min rawn barh luh tak hnu-ah RTI hmanga sual thuhruk dapchhuah tum pawl an lo piang chhuak a. Pawl thenkhat te hmalakna avanga sual nawrtawm a nih dan phei chu thanthu ngaihnam a tling ta.

**Lo hlauhawm tak a ni**

Corruption ti nasa, inhaivur thur thur thin te dinhmun hi enchian sak a ngai a ni. Kan veng, kan khua, kan khaw chhehvel leh rampum huapa mi inhaivur nasa, khawvel thil an neih avanga kan awh fo te chik takin i en teh ang u. An tisa nawmna chuan kum engzat nge a daih? Diklo taka inhaivur zinga thlah mumal nei lo an tam zia te, hrehawm taka thi tam zia te, chhungkaw kehdarh tam zia te i hmuh chian hunah meuh chuan 'kei leh ka chhungte erawh hi zawngin Lalpa rawng a ni kan bawl dawn ni' i ti thei em lo anih pawhin corruption lakah i theihpatawpin i inthiarfihlim ngei ang.

**Corruption tam chhan**

Transparency International India leh Centre for Media Studies in an buatsaih – 'India Corruption Study 2005 to Improve Governance' in a tarlan dan chuan an zirchian chin state 20-a corruption lo awm chhan bulpui pasarih te chu : transparency leh accountability awm tha lo te, corruption report-na awm tha lo te, sorkar official te rinawm tawk loh vang te, intham hi nunphunga kan neih tawh vang te, Judiciary that tawk loh vang te, economic policy tha awm loh vang te, leh sorkar hnathawk te training leh orientation neih that loh vang te an ni a.

PRISM in Mizorama corruption nasat chhan bulpui pathum nia kan hmuh ve thung chu - mi corrupt-ten Dân hremna an tawh thin loh vang te, kan politic khelth dân that tâwk loh vang te leh kohhran leh NGO tam zâwkin corruption kan pawm vang a ni thung a ni.

**Corruption hi tute emaw hmanrua a ni thei em?**

America rama cheng hmasa te chu Mizo te ang bawka hnam huaisen leh ralhrat, Red Indian tia kan hriat thin an ni a. Mingo ho chuan tharuma an thunun theih loh avangin a thlawnin eitur leh eng i lo an pe chiam chiam a, an hmetmit der a ni tih kan hria a. Hetiang chi deuha hnam lian zawkin hnam tenau zawk an upbeh tak chanchin hi khawvel hmun hrang hrangah hmuh tur a awm a. Hetiang hian India hian Mizo hnam min upbeh tumin corruption ti vak a, ral turin min duh a ni thei ang em?